

Upravni odbor duboko zabrinut zbog nedostatka napretka

Na sastanku u Briselu održanom 15. juna na nivou političkih direktora, Upravni odbor Vijeća za provedbu mira je izrazio duboku zabrinutost zbog nedostatka napretka u provedbi Daytonskog mirovnog sporazuma i Madridskih zaključaka.

Upravni odbor je posebno uznemiren zbog neodgovarajućeg funkcioniranja zajedničkih institucija Bosne i Hercegovine (BiH), posebno Parlamenta BiH. Efikasnost ovih institucija se mora odmah značajno poboljšati. U tom kontekstu, Upravni odbor također zahtijeva da se odmah uspostavi Stalni sekretarijat Stalnog komiteta za vojna pitanja. Odbor očekuje da ovaj Sekretarijat bude uspostavljen do 7. jula.

Osim toga, Upravni odbor je ozbiljno zabrinut zbog nedovoljnog funkcioniranja institucija u Federaciji. Bez odlaganja se moraju unaprijediti sigurnosni uslovi, a paralelne institucije, kao i etnički lanci komandovanja u institucijama Federacije, se moraju ukinuti. Njihovo stalno postojanje pet godina nakon sporazuma o Federaciji i skoro četiri godine nakon Daytonskog mirovnog sporazuma je označeno kao sramotno. Nadalje, nedostaci u ekonomskim reformama u Federaciji i opseg korupcije su užasavajući, te ih donatori i njihovi poreski obveznici mogu samo smatrati provokacijom.

I na kraju, Upravni odbor je sa zabrinutošću primio k znanju da se povratak izbjeglica, pogotovo manjinski, i ove godine odvijao sporo.

Upravni odbor odlučno apelira na političke lidere u BiH da imaju na umu kriterije za prijem u Vijeće Evrope, kao i uslove

koji se navode u Paktu za stabilnost za jugoistočnu Evropu.

Realizacija sredstava obećanih na donatorskoj konferenciji je bila uslovljena provedbom Daytonskog mirovnog sporazuma i Madridskih zaključaka. Ukoliko se situacija ubrzo ne popravi, lideri u BiH rizikuju da izgube finansijsku potporu međunarodne zajednice i njihova nastojanja da integriraju BiH u Evropu.